

SATIYACU **Meitanü'axüa**

Vaürisica

¹ Ne Satiyacu Cacaüyarisie mieme necatini'uximayatametüni Ti'aitame Qesusi Cürisitusie mieme. Naisarie xemeutayeixüa necanixevaüritüaca yunaime tamamata heimana yuhutame nuivarite.

Cacaüyari que mütatipitüa temütemaivavenicü

² Ne'ivama naimecü xeyutemamaviecame xequeneyu'erieca quepaucua xemüta'inüasiene 'inüari yücü mü'anecü,

³ müpaü xetemaitü, müpaü xete'inüasieme yuri xüca xete'erieca yemecü, mücücü xete'uca'enivatü xepacüne.

⁴ Xequenaye'axüa xete'uca'enivatü müpaü xemütemasiücünicü müyuxevicü xe'iyari, tixaü mücareuyevesecü.

⁵ Me xüca xevitü xeme ca'aye'aveni mütimaivenicü, müpaü quetitavavirieni Cacaüyari. Müpaü catinapitüamücü. Cacaüyari 'aixüa 'iyaricü catinivamicuani yunaime cavatate'atü.

⁶ Müpaü quetitavavirieni yuri ti'erietü xEICÜA, tixaü huta 'iyariyari cahexeyatü. Que mü'ane huta 'iyariyari mexeiya, mücü hamevaripaü caniyüüneni haramarasie mieme mu'equipaü muyuanepaü.

7 Mücü müya mü'ane mecuxi pütihayeva müpaü ticu'erivatü quename tipitüarieni. Ti'aitame tixaü pücatipitüani

8 tevi huta 'iyariyari mexeiya mühücücü, müyuxamurie yuyeyiacü naimecü.

9 Ta'iva tixaü mücatihücü ve'eme queyuxatani müpaü ra'erivatü ve'eme que mürayeitüarie.

10 Xicutütü meta ve'eme queyuxatani müpaü ra'erivatü tixaü catihücütütü que mürayeitüarieni, müpaü timaitü, 'üxa xuturipaü peuyani.

11 Tau paneica xücatü, 'üxa pütivasiüxa. Xuturiyari pücaxürüve, visi mütiyuxexeyacai putiyünaxü. Yaxeicüata tevi müxicu pütavaxime yuyeyiacü sepa que mütiyuriene.

Que mütiuca'eniva 'inüasietü

12 'Aixüa cani'itüarieca que mü'ane mütiuca'eniva 'inüasietü. Mücü 'inüasieme tucari canipitüariemücü 'inüaricü, yaxeicüa muma que müranutimaniyarie que mü'ane müvara'iva nausaricü, müpaüta catinitamarivamücü, Cacaüyari que mutayü quename vamini müme meminaqui'erie.

13 Tevi mexi 'inüasiexime müpaü pücahaineni, Cacaüyari püta caniyüaneni nesi'inüatatü haitü. Cacaüyari pücayüve müta'inierienicü para 'axa mütiyurienenicü. Yaxeicüa mücü püca'ita'inieni tevi, para mücü 'axa mütiyurienenicü.

14 Yuxexütü masi yücümana mepü'inierie 'axa memüteyurienicü. Meteyucahive'erietü mepüyuyianüa mepüyuhapaninüa yücümana.

15 Tiyucahive'erietü cuitü 'axa pütuyurieneni. 'Aye'ame 'axa tiuyurienetü, vaüriyarica

pümüni, yaxaicüa 'uca 'ayehucatü vaüriyarica mütinivenipaü.

¹⁶ Xepücate'irüviyarieca ne'ivama nenaqui'erima.

¹⁷ Naitü 'imiquieri 'aixüa mü'ane, nai temüte'umiquie müraye'axe, mücü taheima canimiemetüni. Canacaneicani hecüarivivamete va'uquiyarisüa miemetütü. Mücü püca'yupata, ni 'etüriya que mütiyupata tau 'acayunirümecacu, müpaü pücatiyupata.

¹⁸ Yücümana müpaü tiuyühüaveca püta'utavevie, müpaü 'utayüca niuquicü yuri mainecü, para tame tita mütiunetüasie mieme visi temütexeyariecacü, tame nivesicapäü temütexeyariecacü yacütüniquetü.

Que müreuyevese yatemüteyuriecacü niuqui que maine

¹⁹ 'Ipaü xequetenemaica ne'ivama nenaqui'erima. Peru yunaitü teüteri mequeyumexütüaca memü'enananicü. 'Emequeteheutevini püta memütiniunicü memüyeha'anicü.

²⁰ Tevi ha'atü yapücaticamieni heiseriemecü, Ca-caüyari que mütxeiyä.

²¹ 'Ayumieme xequenevivi nai mütiyusevixima, nai 'axa müti'ane naisarie manayuhayeva. Xeca'ayu'eririyatü xequeneutanaqui'eri niuqui xe'iyarisie muca'iteüsie. Mücü caniyüveni xe'iyari mütavicueisitüani.

²² Niuqui que maine yaxetecahutü xequenacüni. Xe'i'enietü xEICÜA xepüca'yüaca capa xeyucüamananicü yücümana.

23 Xüca niuqui 'enieni xeicüa, xüca yacaticamieni, tevipaü caniyüaneni xicürisie müyu'ixüari yühüxie que mütiyuxexeiya.

24 Yu'ixüarieme caniyemieni, yapaucua que mütiyuxexeyacai püratümaiya.

25 Que mü'ane masi mütaniere mücü 'inüarisie müraye'axesie mütasixünasie, que mü'ane mücüsie mü'ayumieme, xüca 'u'ename caratümaiya, masi xüca yaticamieni müpaü tiyurienetü, mücü 'aixüa cani'itüariecamücü yatiyurienetü.

26 Tevi xüca rayexeyame yu'erieca, peru xüca ca'ipirenutüaca yuneni, mücü masi yücümana caniyucuamananeni, yacü xeicüa catinayexeyani.

27 Me xüca rayexeyani 'itiyatü caseviximarietü, Cacaüyari müta'uquiyari que mütixeiya, müpaü püta caniyüanemücü. Caniva'üviyacamücü memünutuixietüca viyurasixi meta mexi me'uximatüarie. Püyü'üviyanita, tita cuiepa mütimieme ca'iseviximanicü.

2

Que mütivaru'imaiyaxü yücü memücatevaxeyacü teüteri

1 Ne'ivama, Qesusi Cürisitu Tati'aitüvame visi mü'anesie yuri que xemüte'erie, xequeteneuhayeva yücü xetevaxeyatü teüteri.

2 Mana tevi xüca heütahani xemüyuyexexeürivasie huru hanirayari vatimanatücaitü visi mü'ane 'anacatütü, xücarita mana heütahani xevitü cui mavetü 'anacatünitü, quesü 'uyüni.

³ Xücarì cui xe'ixeyani que mü'ane visi mü'ane manacatücü, xüca müpaü xete'icühüaveni, 'Ecü xüa 'ena quenacani 'aixüa mü'anesie, xüca müpaü püta xete'icühüaveni tevi mümave, 'Ecüsü 'umapaitü queneuveni, mesü 'ena nehetüa queneucani,

⁴ cari huta 'iyariyari xepexeyia, cari 'isücate xepayuyeitüa, peru 'axa xeteyücühüavetü.

⁵ Xequenene'eniëca ne'ivama nenaqui'erima. Tamüsü Cacaüyari püvaranuyeteüxixü müme cui memümamave cuiëpa memütama que memütevaxeyia. Müme masi meheuca'ucame püvarayeitüa yuri que memüte'erie, para vahesie mütinaquenicü müme memaye'axüanicü tiva'aitüvame mayanicü, que mutayü quename vapitüani müme meminaqui'erie.

⁶ Xeme püta ca'aye'aveme xepüxata mümave. Tamüsü xicusixi mecatehüme memütexe'uxitüa. Müme mecatehüme memüxehapa 'isücate vahesüa.

⁷ Tamüsü mümetütü mecatehüme memisevixima que mü'anesüa xemümiëmete, 'axa me'utiyuatü hepaüsitana. Mücü que mü'ane mühücü, mücü 'aixüa pü'ane.

⁸ Me xüca 'acu xeheye'atüani Ti'aitame 'inüariëya, 'utüarica que maine, Pepinaqui'erieca 'ahëpaü tevi yaxëicüa que pemütì'anaqui'erie manuyüne, 'aixüa canì'aneni.

⁹ Me xüca yücü petivaxeyiani teüteri, 'axa xëcaniyüaca. 'Inüari niuquiyari püxehëcüata que xemüte'itisana.

¹⁰ Que mü'ane naimesie yamüticamie 'inüari niuquiyari que mainesie peru xüca xëi niuquiyari hepaüsita 'utiquëtamüre, masi hesiena pütühüivani misëviximacü 'inüari naimë.

11 Que mü'ane müpaü mutayü, Pepüca'icumaüvani xeime 'üyaya haitü, мүcürita müpaü niutayüni, Pepücare'amemivani. Mericüsü sepa xeime 'üyaya pemücacumaüva, perusü xüca peti'amemivani, pepitisanaxü 'inüari niuquiyari.

12 Que xemutiyuane, que xemüteyurie, müpaü xequetenemaica, 'isücame canixeta'ivaviyamücü 'inüari mütasixüna que maine.

13 Que mü'ane mücatiyucananimaya, 'isücame ca'inenimayatü pitahüave. Perusü que mü'ane mütiyucananimaya, мүcü püra'iva sepa 'isücame mitahüave.

Xüca yuri ti'erieca niu tixaü catiyurienetü, yuri que müti'erie canimüquini xeicüa

14 Qesü 'uyüni ne'ivama, tevi xüca yuri ti'eriecame yuxatani, peru tixaü 'asicatiyurienetü. Müpaü niu yuri que müti'erie, queri tiyüveni para mütavicueisitüarienicü.

15 Ta'iva 'uquitütü 'ucatütü xüca 'anacavix-urica, xüca 'icuai heuyehüaca tucarisie mieme,

16 xevitü xeme xüca müpaü ticühüaveni, 'Aixüa pereu'erietü quenemie. 'E'ayesuime quenanacatüqui, queneutahuxai, 'utaitü, peru xüca xeca'imini tita müreuyehüva yuvaiyarisie mieme, quesü 'uyünicuta, 'aixüa pücaüni.

17 Yaxeicüa xüca niu yuri ti'erieca, peru xüca tixaü 'asicatiyurieneni, yuri que müti'erie pümüqui xeicüa, yücümana 'asimücaüvecü.

18 Perusü xevitü xüari müpaü pütayüni, Mericüte 'ecü xeniu yuri pepüti'erie, ne masi tixaütü nepütiyuriene. Quene'ahecüata yuri que pemüti'erie tixaü 'asipecatiyurienetü, ne masi

tixaütü 'asinetiyurienetü nepünehecüatani yuri que nemüti'erie.

¹⁹ Xüari yuri pepüti'erie xeniu quename Cacaüyari yuxevi. Mericüte 'aixüa pepaine, peru 'asita cacaüyarixi 'axa memü'anene müpaü yuri mepüte'erieta. 'Ayumieme mepuyüyüacatüca maricacü.

²⁰ Cari yacü xeicüa pepüticuxata. Tietüsü pe'avaüriyani müpaü pemüretimanicü, tevi 'asimüca'yüvecü xüca yuri niu ti'erieca tixaü 'asicatiyurienetü.

²¹ Mericüsü ta'uquiyari 'Apurahami heiserie pupitüarie tixaütü mütiuyuricü quepaucua yunive 'Isahaqui mavari mayeitüaniquecai müratimavarüvasie.

²² Müpaü xüari pepütimate, yuri ti'erietü 'iya, 'axeicüa tixaü 'asipütüyurienecai. Yuri que müti'eriecai, paye'atüarie müpaü tiyurienetü.

²³ Müpaü tiyurienecacu 'utüarica naye'ani müpaü manuyüne, 'Apurahami yuri tinita'eririeni Cacaüyari, 'ayumieme heiserie hexeyame cani'erivacaitüni. Cacaüyari hamicuya niutaterüvarieni.

²⁴ Müpaü xüari xepütemate, 'asitiyurienetü xeicüa heiserie püpütüarieni tevi, yuri ti'erietü xeicüa pücatixaü.

²⁵ Mücürita yaxaicüa pütüyuri 'asita Xahavi 'ucatütü tuminicü muyuvitünüacai. Tamüsü tixaütü mütiuyuricü heiserie canipitüarieni, quepaucua cuyaxi müvarutanaqui'eri niuqui tuayamete, quepaucua xaüsie müvarenü'a xeime huyeyari 'utüa.

²⁶ Ravaiyari canimüquini careca'iyaritü. Yaxe-

icüata yuri ti'erietü, peru tixaü 'asicatiyurienetü,
canimüquinita yuri que müti'erie.

3

Taneni que mütiyuruva

¹ Ne'ivama te'üquitamete xepüca'acüne
yunaitü, hipatü xeicüa, müpaü xetemaitü, tame
temüte'üquitamete tahesie masi vaüca pürahüivani.

² Vaücavamecü tepecaxürüve tanaitü. Xüca tevi
niuquisie cahecavauseni, mücü canaye'aveni.
Caniyüveni müyupirenutüanicü yuvaiyarisie
naime.

³ Xüca pirenu tevarutaqueisitüani cavayasixi
memütasi'anu'enienicü, mücü vavaiyari naime
ta'aurie tepahüpani.

⁴ Neuxeita naviyasixi 'ememünene. Sepa
memu'equetüca 'eca mütürücaüyecü, ta'aurie
mepaxüriva titunisitüvame 'esimüyevacü, que
mütiyuvaüriya ta'aurie mehüanicü 'inü'avame.

⁵ Yaxeicüa taneni püyuxevi xeicüa 'esipetü, peru
marivemecü caniyüveni ve'eme müyuxatanicü.
Camü macucüyexiyasie xüca 'utinaini tai
'esipemecü, mücü caniyüveni 'e'acuyeume
mütaxüsütüani.

⁶ Taneni meta taipäü caniyüveni. Cuiempa
timieme tixatatü 'epüyeca tavaiyarisie, tita
mücatiheiserie naime tixatatü. Tavaiyari
püsevixima naime. Pütasixürimüsitüa tatucari
naime. Xasi taiyariyarisie mieme panunetüarie
mütacacü.

7 Yunaitüri que memü'anene yeutari, viquixi, cuterixi, haramarasie quiecatari, yunaitü mecanimaxiusievaveni, teüteri yücümana menivamaxiutavaveni.

8 Peru tevi püçayüve mimaxiutani yuneni. 'Axa catiniyurieneni, püyuxamuriene xeicüa. 'Uhaye mümüiyacü xeicüa pühüne.

9 Tanenicü 'aixüa teputiyuane Ti'aitame müta'uquiyari hepaüsita. Tanenicü meta teüteri tepüvaruxaxata 'axa memü'itüarienicü, sepa Cacaüyariपा me'ananetü memutiveviya.

10 Xei tetayarisie püvayeneica niuqui para 'aixüa mü'itüarienicü para 'axa mü'itüarienicüta 'axeicüa. Mücü 'aixüa püca'ane ne'ivama.

11 Haixapa que tivatineica heuxeicüa ha hacacatü hacucütü.

12 Ne'ivama xapasie que tiyüve huriva tacariyari mütixuxuavere, 'icü meta, caxie nanayarisie que tiyüve mütixuxuavere xapa. Yaxeicüata haixa ma'usivi müvatineica 'aixüa ha'aneme mayuyetitüani püçayüve.

Que mütimaive müpaü tiupitüarieca taheima miemecü

13 Xevitü xeme xüca timaiveni, xüca vaüca timaica, 'aixüa 'anemecü yüanetü queyuhecüatani, quename ca'ayu'eriyatü yatiyuriene, que müreuyevese müpaü mütiyurienenicü timaivetü.

14 Me xüca hasivimecü xe'ütesaca xüca yuhesie mieme xeicüa xeyüaca yu'iyarisie, mecuxi xepücateyucatave'erieca, mecuxi xepücate'itavani xehye'unietü tita yuri müraine.

15 Müpaü que xemütemate xüca müpaü 'aneni, taheima miemecü xepüca'upitüarie. Cuiepa püta

canimietüni, teüteri va'iyarisie pümieme, ca-caüyarixi 'axa memü'anene vahesüa pümieme que xemütemaivave.

¹⁶ Haque memü'ütesa haque yuhesie mieme xecüa memüyüa, manarita mecaniyuxamuriecuni, naime 'axa müti'anecü mepüyüaca.

¹⁷ Masi que mütimaive taheima miemecü 'upitüarieca, pü'itiya meri, meta 'aixüa pütivaxeyasitüa hipame, püca'ayu'eriya, pütüyu'aitüarinüa, yuheyemecü pütüyucananimaya, 'aixüa pütüyuriene, 'uximayasica que müreyevese, huta 'iyariyari pücahexeiya, yacü xecüa pücati'itava.

¹⁸ Müme 'aixüa memütevaxeyasitüa teüteri, yu'uximayasica que memüte'u'esa cayuvatü mehhexeyatü yu'iyarisie, que mütitixuavere, mücücü heiserie mecanipitüariecuni.

4

Tepüca'inaqui'erieca tita cuiipa mütimieme

¹ Titayari xeteyucuyatatüve, mücü haque pemieme. Titayari xeteyucuitüve. Tamüsü xemünaqui'acacü xecüa xepüyüa, 'ayumieme müpaü xepüteyurie, mücü naqui'eriya müyumiencü xevaiyarisie.

² Tixaütü xepütehive'erie, peru xepücahexeiya, 'ayumieme xepüteyumemiva. Mücü meta, xepüyumexütüa hipame vahepaüsita xevara'ivacutü, peru xepüyutexie tixaütü xetehexeyatü xemacüncü, 'ayumieme xepüyucuitüve xepüyucuyatatüve. Masi xepücahexeiya xemüca'ivavacü.

³ Sepa xemütevava, tixaü xepücateyeturiräva, xe'iyari 'axa 'anecacu xemütevavacü, xemicas-itaruvanicü xenaqui'acutü xeicüa.

⁴ Cari xeme teüteri hipame va'ütama memüvacumaüva vahepaü xepüyüa. Xüari müpaü xepücatemate, xüca 'inaqui'erieca tita cuiepa mütimieme, pi'uxive'erie Cacaüyari. 'Ayumieme que mü'ane müyuvaüriya minaqui'eriecacü tita cuiepa mütimieme, mücü Cacaüyari 'aye'unietü payuyeitüva.

⁵ Mesü müpaü püta xetecu'eriva 'acu, quename xeniu 'utüarica yacü xeicüa haine, Cacaüyari 'ütesatü pihive'erie mücü 'iyari mütasi'utuitüa tataüta, que maine.

⁶ Peru mücü vaücavamecü masi 'aixüa tiuca'iyaritü pütasiyurie. 'Ayumieme müpaü paine, Cacaüyari nivaraye'unieca müme memüte'ucatave'erie, 'aixüa tiuca'iyaritü püta püvayurie müme tixaü memücatehüme.

⁷ 'Ayumieme xequenyuvaüriyani Cacaüyari mütixe'aitüacacü. Xequenaye'unieca Cauyumarie. Xüca müpaü xeteyurieca, mücü Cauyumarie püyuta'una xehesüa.

⁸ 'Aura xequenacüni Cacaüyarisüa, mücüta 'aura payani xehesüa. Xequeneuyu'itiexüa yumamasie xeme 'axa teyuruvamete. 'Aixüa 'ane xequenayeitüa yu'iyari xeme huta 'iyariyari xemexey-acü.

⁹ Xequene'uximatüarieca yu'iyarisie masi, xequenyuhiverieca xequeneutisuanani. Xenanai quepasieca hiverica mayanicü. Xetemavierica quehüiyani xexüxünitü püta xequenacüne.

¹⁰ Tixaü xecatehümetütü xequenayuyeitüani

Ti'aitame hūxie. 'Ana мүcü vavemete
pūxe'ayeitūani.

Ta'ivama vahesie tepūcate'uhūpani

¹¹ Xepūcayuniuquimaca ne'ivama. Que мү'ane
miniuquima yu'iva, que мү'ane yu'ivasie
mūtiuhūpa, müpaü tiyurienetü piniuquima 'inūari
niuquiyari, pūtiuhūpa 'inūari niuquiyarisie.
Mericūsü xūca 'inūari niuquiyarisie petiuhūpani,
que мү'ane 'inūari niuquiyarisie yamūticamiepaü
pepūcayūane, 'isūcamepaü xeicūa pepūyūane.

¹² Que мү'ane 'inūari niuquiyari mucaye,
que мү'ane мү'isūcame, мүcü caniyuxevini.
Mүcü caniyūveni mūtiyutavicueisitūanicü
mūtiyuca'unanicü. Quecuta 'ecü pe'ane 'ahēpaü
tevisie pemūtiuhūpanicü.

*'Asixepūcatemate 'uxa'atūni que mūtiyūni
hepaüsita*

¹³ Neuxei xeme müpaü xemutiyuane, Hicūri
'uxa'a nusu tepūyehu мүcü quiecarisie ya
mүcүsie, mana xei viyari tepeyurieni, mana
tepetaharerutatūveni tepūte'ivatūveni xeniū
xemutiyuanepaü.

¹⁴ Xeme 'asixepūcatemate 'uxa'atūni que
mūtiyūnicü. Qesü titita xetucari. 'Aūxi
xecanihūmetūni xeicūa. 'Aūxi 'epūcareutere
xeiyarietü, cuitü caxeyarietü payeica.

¹⁵ Masi peuyevese müpaü pūta xemutiyua-
nenicü, Xūca müpaü tinaqueni Ti'aitame,
tepayeyuyurini, meta 'ipaü ya müpaü
tepūteyurieca, müpaü xe'utiyuatü.

¹⁶ Peru hicü masi ve'emete xepūyuxata
xeteha'erivatü que xemūteyucatave'erie xeicūa.

Naime müpaü que xemutiyuane yuhepaüsita, 'axa xepüteyurie.

¹⁷ Mericüsü que mü'ane müpaü mütime 'aixüa mütiyurienicü, peru müpaü mücatiyuriene, mücü 'axa pütiyuriene püta xEICÜA.

5

Xicusixi memüteyuca'uximatüa

¹ Hicümüsü xeme xemeuca'u. Neuxei, xequeneutisuani xequeneutihivani müpaü xeteha'erivatü 'uximatüarica müxe'axirümecü.

² Titacü xemüteheuca'u, mücü pütitipüque. Xe'ixuriqui püticümiva cüpisi mepiyuine.

³ Xehuru tepüayari xepürata tepüayari püyucuitamatüca. Cuitayari pütihecüata xehepaüsita. Xepüyuhiveritüa, yaxEICÜA tai que mütiyucucüinecü xevaiyarisie. Sepa tucari mütaparirüme xepuyuca'uitüa xEICÜA.

⁴ Camü te'uximayatamete va'ivarica. Mepicuxeüri xevaxata mieme, peru xepüvacuamana xeme. Va'ivarica pümasiücü meuyevesecü. 'Isanamete metihivacacu, que mü'ane Yümüireme Tiva'aitüvame mühücü nivaru'enieni.

⁵ Xemeri hive'ericacü xEICÜA xeyüatü 'axepu'uvacai cuiapa, xerucuyatüvetü xEICÜA xepü'ayumiemetetücai. Xepüyuvaiyatüacai vacaisixi vahepaü xemücüi'ivanicü xEICÜA.

⁶ Xepixanetacai que mü'ane heiseriemecü yamüticamiecai. Xepe'ivaxü, xepimi. Peru mücü pücaxe'aye'uniecai.

*Xepücavaüripieca xete'uca'enivatü, xe-
quenyunenevieca*

7 'Ayumieme ne'ivama xete'uca'enivatü xepücavaüripietücani, Ti'aitame mexi canuave. Camü cuiepa 'esame picuevie 'icuaxi cuiepa mieme cui müraye'axe. Pücavaüripi sepa 'emüreutere 'auracacu mieme 'icürixa mieme ha tacuevietü.

8 Xemeta xepücavaüripietücani xete'uca'enivatü. Xequeneyutürücariyani yu'iyarisie. Canaye'aximeni Ti'aitame munuanicü.

9 Neuxei ne'ivama, xeme niuqui xepücaxüatüaca yu'ivama vahepaüsita, capa 'isücame xetix-ani'erienicü. Camü mücü quitenie püta'axime.

10 Texaxatamete Ti'aitamesüa memiemetetütü memütecuxatacai, müme xequenivara'erivani ne'ivama 'üquisica memühümetücaicü, 'axa mü'ane menevietü que memüte'uca'enivacai temüva'üquenicü.

11 Camü müme memüte'uca'eniva 'aixüa me'itüariecame tepü'erie. Xepu'enana que mütiuca'enivacai Cuvi. Müpaüta xepütehetime 'arique Ti'aitame que müreye'atüa, Ti'aitame cuini mieme que mütiyucananimaya.

12 Sepa naimecü ne'ivama, xepücayühürütüaca. Sepa taheima mieme xexatatü sepa cuie xexatatü sepa que tita mütihücü xexatatü, xepücayühürütüaca. Xüca xeyuvaüriyani, hü xequeneutiyuaneni xeicüa. Me tixaü xüca xecayuvaüriyani, tixaü xequeneutiyuaneni xeicüa, capa xehesie tiuhüivatü 'ayanicü.

13 'Axa mü'ane xüca nevieximeni xevitü xeme, queyutanenevieni. Me xüca yutemavieca que'utacuicani.

14 Xüca ticuyeni xevitü xeme, yu'aurie

quevaretacuevieni memüyuyexeüriva
 va'uquiyarima. Müme meque'ineneviyani
 me'icavirivatü haseiti, que mü'ane müti'aitame
 mücü mehahüavetü.

¹⁵ Que memüteyunenevie yuri mete'erietü,
 mücücü pütavicueisitüarieni ticuicame, Ti'aitame
 penucuquetüani. Mücü meta, xüca 'axa tiuyurieni,
 mücücü püreuyehüviyarieni.

¹⁶ 'Ayumieme hipatü mexe'eniecacu
 xequeneyuhecütani xüca 'axa xete'uyurieni,
 xemüyuneneviecacü yuxexuime yuhesie mieme
 yunaitü, müpaü xete'ivautü xemanayexüriyanicü.
 Que mü'ane heiseriemecü yamüticamie, mücü
 nenevierieya vaüca caniyüvemücü Cacaüyari
 müpaü xüca ticuyuitüvani.

¹⁷ 'Eriyaxi canitevitücaitüni tahepaü
 tiuca'iyaritü. Mücü cuini mieme püyuneneviecai
 mücacaviyecü. Püca'ucaviyexü mana cuiepa haica
 viyari heimana 'ataxeime meseri.

¹⁸ Tavari puyutanenevi, 'ana muyuavisie pu-
 caviyexü, cuie pitixuavitüa 'icuaxi.

¹⁹ Ne'ivama xüca xevitü xeme heuyevauseri tita
 yuri mürainesie cativiyatü, xüca xevitü ta'aurie
 hehüani,

²⁰ müpaü xequetenemaica, que mü'ane
 ta'aurie mehüa 'axa tiyuruvame haque meuyeve
 müca'uyeicanicü, mücü pitavicueisitüani tucarieya
 müca'umünicü. Sepa vaüca 'axa mütiuyuri, mücü
 canayeitüariemücü.

**Cacaüyari niuquieya xapayari türatu hecuame
hepaüsita tati'aitüvame tasivicueisitüvame
Qesusi Cürisitu mi'atüa
New Testament in Huichol (MX:hch:Huichol)
El Nuevo Testamento de nuestro señor y salvador
Jesucristo**

copyright © 1988 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huichol

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022

79690d81-fd4b-51b4-a3a6-712e0fddaca3